



**B**runo Ludolphi Ducis Saxonie filius, & patruus Henrici Aucupis Regis Rom.  
 in sine nomen reliquit vico, quem ille primus inchoauerat, qui ex illo dictus  
 est Brunonis vicus, aut potius sinus, qui lingua Saxonum vocatur VVijck, ho-  
 die tamen communiter appellatur Brunsvich (tenui in asperam mutata, cu-  
 ius etiam paulò ante mentionem fecimus in Hassia.) Est autem vrbs ea Du-  
 catus Brunsvicensis metropolis, qui ab ea nomen quoque suum adeptus est,  
 & magna admodum, populosa, mœnibus ac fossis munitissima, turribus ac  
 propugnaculis firmata, decorata magnificis domibus, præpolitis plateis, am-  
 plis & ornatissimis templis, per quadrum tantum ferè habet longitudinis quantum latitudinis,  
 complectiturq; in suo ambitu duo millia passuum. Est aliquãto maior Noriberga, & minor Erphor-  
 dia. Ad Orientem habet dioecesim Magdeburgensem, ad Meridiem Hartonicum seu Hercinium ne-  
 mus: occidentem partem comprehendit Hildesheimensis episcopatus, & Septentrionem inhabitant  
 Lunaburgenses. Hanc urbem perlabitur Ornaca amnis, cui origo sylvæ est Hartonica; duasque in  
 partes civitatem scindit, omnem secum trahens immundiciem, varijs vndique pontibus cooper-  
 tus. Tota vrbs in plano sedet, mœnibus ac fossa duplici profundissima & aliquot in locis triplici,  
 ac qualibet aquis stagnante munita. Vallum etiam inter fossas crassissimum ductum per circuitum,  
 varijs arborum confitum generibus, non habet civitas aquam potabilem, sed communiter bibunt  
 cerevisiam, Vini autem vsus charior est & rarior. Inter cæteras Ducatus huius civitates haud po-  
 strema quoque erit Goslaria, quam Henricus I. pater magni Ottonis, urbium amator in formam ci-  
 vitatis erexit. Anno 1051. Imperator Henricus 3. ingentibus regni florens opibus, urbem istam  
 mirificè ornauit, quam de paruo molendino, vt aiunt, vel tugurio venatorio duo priores Henrici,  
 & iste nunc tertius in tam magnam sicut hodie cerni potest urbem bono prouexerunt auspicio, in  
 qua regale palatium hic Imperator magnificè extruxit, & duas omnipotenti Deo congregationes  
 instituit. Dicitur Otto I. Imp. apud Goslariam argenti inuenisse mineras, quarum magni fuerunt  
 redditus, ex quibus Imp. duo construxit sacerdotum collegia, & regium palatium nobilis operis. Ab-  
 utentibus autem ciuibus suppeditatis diuitijs, offensus Deus permisit puteum vnum corruiere, quo  
 casu mille homines & supra oppressi fuerunt. Et post illud tempus neque argentum neque aurum  
 fuit amplius inuentum in eo loco sed plumbum nigrum. Perhibent autem metallum Goslariæ sic  
 natum: Quidam nobilis homo equum cui nomen erat Ramelus, in monte ad ramum arboris alli-  
 gauit. Is vngulis quibus ferreæ soleæ inductæ, terram quatit, verrit, atque ita reconditam plumbi  
 nigri venam integumentis nudauit, non aliter ac Pegasus alatus aperuit fontem dum vngula ferit  
 saxum, vt autem fons iste ex eo vocatur Hippocrene, ita montem incolæ Ramelum vocarunt, qui  
 hodie maximè floret, atque admirabilem plumbi copiam suppeditat, Goslariæ tantum inuenitur  
 galenæ & pyritarum, ex quibus plumbum nigrum excoquitur, vt mons quidam ferè nihil nisi ga-  
 lena & pyritæ esse videatur. Ducatui huic vicinus & Halberstadiensis Episcopatus, itidem à metro-  
 poli eiusdem in eo nominis sic dictus. Perlabitur autem urbem Halberstadium Oltemia fluius, in  
 medio verò tumulus assurgit, in cuius cacumine planities est, duorum ferme stadiorum continens  
 longitudinem, in cuius extremis angulis duo templa sita sunt, quorum alterum pontificale est. In  
 medio latè patet forum, magnificis canonicorum ædibus vndique circum: & hæc pars vrbs voca-  
 tur. Quod sub tumulo iacet, suburbium appellant. In monte nulla laicorum, vt vocant, habitatio.  
 Carolus Magnus huius Ecclesiæ fundator habetur. Est circa hanc civitatem ager optimus, ferax tri-  
 tici. Maturescuntibus frugibus, culmorum altitudinem equo insidentem hominem ferunt excede-  
 re. Magdeburgum fuit olim huius episcopatus Parochia; sed per Ottonem primum ibi Archiepis-  
 copatus est erectus, & Halberstadiensis dioecesis minorata. Fuit episcopatus hic primùm à Carolo  
 in loco Salingstede fundatus, qui hodie Ostervvijck appellatur, & deinde in Halberstadium trans-  
 latus.







